


清·方略館 編

清代 方略 全書

北京圖書館出版社





清代方略全書

一四〇

清·方略館編

北京圖書館出版社

清·奕訢等撰

欽定剿平粵匪方略

卷三九六——四〇八

清同治十一年（一八七二）鉛印本

欽定剿平粵匪方略卷三百九十六 甲子年

十月二十一日 戊子 僧格林沁官文奏言逆衆敗

潰後分股由廣濟奔逃 臣僧格林沁派常星阿

暫充翼長藍斯明幫辦及溫德勒克西蘇倫保

富森保等馬隊姜玉順蕭河清楊朝林梁洪勝

等步隊分兩路追剿九月二十八日抵車盤鋪

留姜玉順楊朝林殿後二十九日常星阿等追

賊至吳文區郭德園一帶截擊獲勝詎山內突
出巨股伏匪襲我後路常星阿等分投迎剿而
前股敗匪又復回撲我軍久戰槍礮俱紅不能
施放山高路狹馬隊阻於馳驅姜玉順楊朝林
相距二十餘里馳援不及蕭河清奮勇掠陣手
刃數賊力竭陣亡常星阿等督隊突出重圍且
戰且退收隊回營十月初一日該逆以一股牽

掣我軍分股由廣濟翻山繞越蘄州濱湖一帶
上竄沿途官軍截擊頗有斬擒初四日賊衆竄
近巴水驛經周鳳山各營出隊迎擊遂由棗茨
嶺直竄上巴河並分股奔下巴河欲撲黃州協
防水師各軍均因賊衆兵單祇能力顧沿江鎮
市要隘不能遠追攔截臣官文急派護衛隊前
往三台河扼守黃州要道該逆前隊由黃岡直

趨麻城縣境初五六等日在黃泥渡擄船又在湯家墩搭造浮橋意圖窺伺武漢均經官軍擊散維時廣濟各軍皆落賊後而賊蹤剽疾沿途雖經官軍截擊小勝未能力遏兇鋒該逆遂由岐亭新洲各路上竄黃陂初七日常星阿等馬步各軍趕到迴龍山臣官文催令繞出賊前現已趕赴上游節節追剿查武穴龍坪田家鎮下

巴河均爲沿江著名市鎮而漢口尤爲根本重地臣官文先令喜昌帶護衛一營星夜赴漢口駐紮穩守城堡復飛調李成謀馳赴橋口又派周鳳山趕赴灡口會合各營保衛漢鎮並暫留由豫來鄂募勇之知府湯聘珍三營駐防黃陂麻城一帶又調萬化林礮船馳往灡口黃花滂巡防調駐防漢口之振威左營及駐防省城之

武勝一營併赴游湖關駐紮其團風鵠公頸一
帶令李濟清袁多如分布梭巡至下游各防已
檄李明惠移紮下巴河之七里鋪兼防蘭谿一
帶譚仁芳移紮羅田扼要駐守遙爲臣僧格林
沁大軍西路接應藍斯明四營暫紮上巴河整
頓軍旅聯絡聲勢其襄河小河口一帶飭張啟
基督船巡防蘭谿一帶卽令左光培接防下巴

河一帶改飭丁長春礮船分段扼紮仍恐該逆
由黃孝窺伺德安檄調駐防樊城之沈俊德一
軍馳赴德安會同趙克彰分隘駐紮一面飛咨
河南撫臣豫派勁旅迎擊以免竄越劉連捷一
軍疊經檄催坐守皖境並未入楚查此次賊匪
巢穴已失形同流寇非合數省兵力會剿無以
制其死命現臣僧格林沁已入皖境距楚漸遠

臣官文擬移營前赴附近黃陂地界以便督剿
至常星阿等此次由廣濟追賊既不能整齊隊
伍謀定而戰出圍之後又不能繞前攔截致該
逆西犯擾及腹地姜玉順楊朝林遲於救援均
屬咎無可辭相應請

旨將副都統常星阿蘇倫保溫德勒克西富森保總
兵楊朝林均革職留任撤去勇號候補提督藍

斯明姜玉順候補總兵梁洪勝均暫行革職撤
去勇號以上各員仍請留營督隊以觀後效儻
再不知奮勉卽行嚴叅治罪候補提督蕭河清
戰功屢著此次追賊遇伏陣亡深堪憫惻相應
請

旨飭部照提督陣亡例從優議卹入祀湖南湖北昭
忠祠並於原籍長沙縣及死事之廣濟縣地方

建立專祠以彰功烈而慰忠魂其餘陣亡員弁
勇丁容俟查明辦理奏入

上命議政王軍機大臣傳諭僧格林沁官文曰賊由
廣濟上竄官文現派常星阿等趕赴上游追剿並
令喜昌等分防漢口等處著檄飭派山各軍實力
嚴防扼要駐紮相機剿辦務期一鼓殲除僧格林
沁追剿獲勝受撫者十餘萬衆該逆心存叵測首

鼠兩端係屬意中之事僧格林沁暫駐黑石渡鎮
撫並著官文妥籌辦理陳得才勢極窮蹙現在英
霍潛太一帶著僧格林沁官文嚴檄各軍前截後
追兩面夾擊務將該逆迅速擒獲並著知照豫省
官軍合力兜剿迅殄逆氛

上諭內閣曰記名提督蕭河清戰功卓著此次由廣
濟追賊猝中賊伏力竭陣亡深堪憫惻著照提督

陣亡例從優議卹入祀湖南湖北昭忠祠並於原籍湖南長沙縣及死事之湖北廣濟縣地方建立專祠以慰忠魂其餘陣亡員弁勇丁著僧格林沁等查明照例辦理所有追剿不力及赴援遲誤之副都統常星阿蘇倫保溫德勒克西富森保總兵楊朝林均著革職留任撤銷勇號候補提督藍斯明姜玉順候補總兵梁洪勝均著暫行革職撤銷

勇號以上各員仍責令留營帶隊勦賊以觀後效
儻不知愧奮卽著嚴叅治罪

二十三日 庚寅 左宗棠奏言自武平失後永定南

靖龍巖俱陷漳郡亦被占踞業經臣調撥勁旅
水陸馳援至臬司張運蘭勦匪向稱得力此次
馳援武平孤軍挫陷身受重傷查無實在下落
所有福建按察使印信現存汀州郡城該處軍

情緊急閩省無知兵大員堪以接署惟查候補
按察使王德榜久歷戎行謀勇兼備先經臣調
赴江西剿賊現在吉安贛州一帶堪令速帶所
部由瑞金入汀會合各軍攻剿並接署福建按
察使篆務以資得力張運蘭下落另行確查具

奏奏入

上命議政王軍機大臣傳諭左宗棠徐宗幹曰張運